

Na osnovu člana 23 Statuta Brčko distrikta Bosne i Hercegovine, Skupština Brčko distrikta Bosne i Hercegovine, na 98. sjednici održanoj 26. augusta 2004. godine, usvaja

## **Z A K O N**

### **O NAKNADAMA ZA KORIŠTENJE PODATAKA PREMJERA I KATASTRA NEKRETNINA I VRŠENJE USLUGA U OBLASTI PREMJERA I KATASTRA**

#### **Član 1**

Ovim zakonom uređuju se uslovi i način plaćanja naknade za korištenje podataka premjera, katastra nekretnina, katastra zemljišta i katastra komunalnih uređaja (u daljnjem tekstu: korištenje podataka premjera i katastra), kao i naknade za usluge iz oblasti premjera i katastra.

#### **Član 2**

Naknadu iz prethodnog člana naplaćuje Odjeljenje za javni registar - Pododjeljenje za katastarske knjige i arhiv, nadležno za poslove održavanja premjera i katastra nekretnina, ukoliko ovim zakonom nije drugačije određeno.

Ako organ iz prethodnog stava ne raspolaže gotovim kopijama, odnosno izvodima iz podataka premjera i katastra potrebnih korisniku, pored naknade za korištenje podataka premjera i katastra nekretnina (u daljnjem tekstu: naknada za korištenje podataka), naplaćuje i naknadu za rad i materijal za izradu nove kopije, izvoda ili drugog podatka (u daljnjem tekstu: naknada za uslugu).

#### **Član 3**

Naknada za korištenje premjera i katastra i vršenje usluga iz oblasti premjera katastra plaća se prema Odluci o visini naknade za korištenje podataka premjera i katastra nekretnina i vršenja usluga (u daljnjem tekstu: naknada za uslugu).

#### **Član 4**

Naknada za korištenje podataka u Odluci, koju naplaćuje Odjeljenje za javni registar, uplaćuje se na jedinstveni račun Brčko distrikta.

#### **Član 5**

Za korištenje podataka i usluga, za koje se plaćaju naknade po ovom zakonu, ne mogu se naplaćivati administrativne takse.

#### **Član 6**

Od plaćanja naknade za korištenje podataka i usluga oslobođeni su:

1. državni organi – za podatke koje koriste za svoje potrebe,
2. strana diplomatska predstavništva – pod uslovom reciprociteta,
3. preduzeća – za podatke potrebne za uspostavljanje katastra komunalnih uređaja (koordinate i položajni opis geodetskih tačaka),
4. lica koja poklanjaju svoju imovinu u korist Brčko distrikta, vjerske ustanove, humanitarne organizacije, ili se odriču prava svojine na zemljištu u korist Brčko distrikta, vjerske ustanove i humanitarnih organizacija – u postupku za dobijanje isprava potrebnih za prenos prava vlasništva,
5. lica koja primaju socijalnu pomoć.

Naknada za korištenje podataka i usluga ne plaća se, ako se ti podaci koriste u postupku:

1. komasacije, uzurpacije, denacionalizacije i agrara,
2. za smanjenje katastarskog prihoda zbog štete od elementarnih nepogoda, biljnih bolesti, štetočina i drugih vanrednih događaja.

#### **Član 7**

Novčanom kaznom od 500 do 1.500 KM, kaznit će se za prekršaj odgovorno lice u Odjeljenju za javni registar – Pododjeljenje za katastarske knjige i arhiv, ako podatke premjera, katastra nekretnina, katastra komunalnih uređaja izda korisniku bez naknade.

#### **Član 8**

Danom stupanja na snagu ovog zakona prestaje da važi Zakon o naknadama za korištenje podataka i vršenje usluga u oblasti premjera i katastra nekretnina («Službeni list SRBiH», broj 35/85 ).

#### **Član 9**

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta BiH».

Босна и Херцеговина  
БРЧКО ДИСТРИКТ  
**БОСНЕ И ХЕРЦЕГОВИНЕ**  
СКУПШТИНА БРЧКО ДИСТРИКТА

Bosna i Hercegovina  
BRČKO DISTRIKT  
**BOSNE I HERCEGOVINE**  
SKUPŠTINA BRČKO DISTRIKTA

Broj: 0-02-022-258/04  
Brčko, 26. august 2004. godine

PREDSJEDNIK  
SKUPŠTINE BRČKO DISTRIKTA

**Mirsad Đapo, dipl. pravnik**

This document was created with Win2PDF available at <http://www.daneprairie.com>.  
The unregistered version of Win2PDF is for evaluation or non-commercial use only.